



NOKDANG

(Dakmesokani)

By

KENETH MOMIN

U'iatsona

Ia dakmesokanio ong'a obostarang, bi-mungrang, biaprang aro manderang pilakan chanchichipanisan ong'aia. Saniba obosta ba bimung apan ong'ode uan ong'akanisan ong'aigen.

Ia dakmesokaniko 1961 bilsio dakcheng-aha aro uko taridape da'o chapa ka'ataha.

Tura,
14th, Sept. 1968.

Keneth Momin, M.A.

Published by :
Tura Book Room
Tura, West Garo Hills Meghalaya
India

Nachenggipa 1969.
Reprinted 1988

Printed by M. K. D. Gupta.
Calcutta—(INDIA)

NOKDANG

Dakmesokani Bak I (nakatchenggipa)

(Medikma morao asonge sarao kilding rika. Ua bils i sotbrimang ong'gnok. Uni knirang bokna a'bachengaha aro kam ka'engani gimin bil'si bil'dak daka. Uni janggalchipak dongchakani a'chik nok te'sa aro tong'sa, ritchudapqipao ba'ra dakani loomo dakmanda dakenganiko nikna man'na. Ua gisik nangbee kilding rike, kilding chotarangko ritchuroroe tarienga.)

Medikma : (kilding rikjoljole, nichaoe) Bachi-nasa sari, sal ingang ingango ?

Walingma : (chel.aoni ku'rang) Aowachisa na'a sari ; ba'ra dokade man'angeng-jokma ? Angnaba kingsa donpa-bone sari. Da'anpakde tikatpaboai ; mijanin kangpaoba man'jaengake angade. Aiao, gannan grimancha-jok !

Medikma : Man'nasigipa dongaba ; nie re'ang-srangboda indakora. Namnikama namnikjama 'nesa. Ja'manode jawa-sa tap dakar.gaignenne.
(Walingma nabara.)

Walingma : (mora on o o asonge) Oemani ; kangal inoba c' , fangan batskaakon da'ning !

Medikma : Darangan an'tangtangkosa, u'iaijok na'a, sari. Uko aganode chingasa batsrangake.

Walingma : Indinoba na'songara namkala. Bachisa, nigalgale katnaha ?

Medikma : Maidaknasa skelbakkell. Gue mang-mangkode cha'e re'angpaboda ; asongkubo na'a.

Walingma : Aia ! Na'asa indina; budepasai ! Tangode nampagnok inagita. Dipet-akon knatimnan amchakjawa.

Medikma : Nang' budepasanjokona; Medikpaba apsanaiake uko aganode. Medik, O, Medik, gue pan ra'ba, nang' manina.

Medik : (nokningoni) Oi, maikone, ai ?

Medikma : Gue pan na'a ; gue pan. Nang' mani re'baako nikjama. Ia bi'sade gisikan nangjasrang ; a.ta jari dakaia. Okamoba pangnan, knaanma knajama ; chakchiktelasama u'ipilja angade Medikkode. (Medik gue aro batao pan chun tin gnanng nabaa.)

Walingma : Ae, Medikkoara mijalon re'angaha ine knaachimba ! Re'angkujane, ha mani ?

Medik : Bao ! Aimangan watatnan sikjaengahake. Koros dongja ine pa.sike noko dongchinasa dongchina agankamaia. An'tangtang gita jari ong'e dongatnasa am'aia.

Medikma : Na'a maiko uipaa' Hambino se kime, bi'sa ba'e nipabo ; unosa u'igen. An'seng an'seng nang' dedrangni motor gario skulchi gakate re'angako kusi ong'e nirikpa'nade angaba

Medik : Aide na'a; indinana agre mamingkon man'jawa. Agansrangode da'skarion watatjahachim ; baba rimdraangani giminsa. Da.ode middle matchota-ha ineming gisikan nangsrangjaha. Jong Balkamkoba watatnan sikja. Angkode pangpang ong'ai ong'jai kal.akesa' rosrangaia da.ode.

Walingma : De Balkamkoara mamatang dak-chakna am'enganaba. Maisa ong'aha da'oara ! Sikipiljahama ? Uaba ku'siksa ku'sik; balwa dakaiajokona.

Medikma : Haida na'a sari. Mijatamba Medikpaming maikon betbetchim-enga. Angara neng'anan katangai-jok. Kang'kare sapila ba'ra dokpa-oba ; salgimikode amjachong'mot. Grom grom dakpilasa.

Walingma : Angaba neng'chipchipainga. Mija saanin da'onaba namsrangkuja. Mande dongjaesa mai ka'kuna ine che'eldraasa kakketaingjok angaba. Wai ! Nang' singer machine subsidy man'baa ingipara namengama ? Mijaon knajok knaade.

Medikma : (kilding rikako dondike Walingma-ko nitate) Aiao ! Baoniko knaningningbea na'aba sariba ! Dongjaba ; sawasa aganaljok nang'nara. Baoniko man'pagnoksa angara !

Walingma : Ae ! Mijao Benam ma'gipasa aganangawai ! Gipinde gri, da'ning, maina tol'aingna ukoara. Angade una una galpaoba bao. Do'po deba'ako agana gita dakaia. Magna magna da'skariba budepako jetjetari seate ra'angpa'jok. Da'o loomna galpaaba mai ong gen ? Ka'dongja angade.

Medik : Haida da.anpakde man'paarok ; sawa u'ia ukora. Galsimsimainan nanga ; man.jaskalde. Sanade on'na, sanade on'ja.

Walingma : Officechi re'nan kratcha'pilawai, mani. Mandeskaba maian inpilgen, s a l s a l d e. Changsamangmang de man'paosaming indakan kride. Magna ja'a neng'gramaia. Gisikba duk man'pila angade basakobade. Cholgriana dakpaoba cholijanan.

Medikma : Agano matnanga gita dakaia man'gipade changsanon man'aia ; Kalengmako niboda. Da'doe na'a gale niskabojok. Haida, nang'na on'engarok.

Medik : Galja dakja ; kratcha'chokchok, man'ara man'jawa.

Walingma Mainasa kratcha.algnok ! Angade galsimsimainggen man'jaskalde. Angaba chol gri. Ba'ra doke cha'pana gisikde sikpara. Bree gannaba amchakpa'ja. Pelsa kapsa dakchakpabea iachiba. Da'ode na.songde ma'ningsa dokna man'gnok ; Medik bik, na'a bik.

Medikma Bao Medik dokalgnoksa ; changan changgijara. Chutturango re'bapapoba indakaranko doke skie ra'pana ingipa gisikde grimancha ia bi'sade. Roamjojonade donaibo. Maharani saksa daknasa am'aia. Mijade pagipa dokna am'enga biko jim'jojoanan. Ang' kattakode bao ; wak nachil dakaia. An'tangkosa u'ibatnikaia.

Walingma Aiao ! Re'najokne sari, ru'utangbe-engaha. Golpode golpoaigen, bon'changjawa. Maian maian insoa budepade. Dipetanan knadikpilasa. Ba'arakode da-gualbone, sarine. Donchongmotpaboai, grimanchajok.

Medikma : Ra, dongenba, sari.

Walingma Mani Medikara re'angani ong'ode re'angna skang grongangpabone. Chitti seatjlnadong.

Medik : Haidarok, na'a mani. Re'anggen ong'ode grongegenba. Dakmanda

namako bree donsobo, sarina ra'-
angjolnadong.

Walingma Korosan amchakja na'a mani; baoni
ba'ra. An'tang' okkon maidake
gapatgen? Jari dakpilaja angade
basakobade. Gue palpanaba ia bils-
de grisrang. Je dongpaakoba gopa
dakeming bilkujaenga, da'onaba.

Medik : Bachi re'esa? Ma, robatelajasama,
da'alde?

Walingma Bao rona jokpagnoksa mani. Bu-
depako donketesa atchugipachi
kam nanganasa katbaengai. Ra,
dongchimbone; re'bebenaha.
(Walingma re'anga aro ma.ningsa
uko chadenge nirika.)

Medik : Mainasa da'alde re'angengasai;
bils gimik ga'dikgija?

Medikma : Maina ong'gen; tangka bi'amna
ong'enggen. Una agrede mai ong'-
gen. (Adita somoe jrip dakani
ja'mano.)

Medik : Ai, Balkamkode Malajingko ka'-
enga ine knaengane. Mijalo Malje
angna agana. Gisiko duk man'be-
engasai biade, da'ning.

Medikma (ka'o nangbac) Ia bi'sade indaken
dakgen. Jekon namnikjawa ukosa
bate bate dake dongen. Namara
nampabea Maljeba. Mamatangba

indakesa gong'piljaengkone. Da'mo re'bakukan biko.

Medik : Na'ade rang'si rang'dat insobo da'oba ; ka'dotrangko. Naminga na-wang ; katbingbangsrangjokode ? (Balkam kusi ong'e, ku-smike na-baa aro chokkio janggil dan' danchakaniko mikkangchi done asonga.)

Balkam : Ai, chingkode ia antion kulignoknade ; angasai ai ? Bakkak re'bajaode admit ka'na . . .

Medikma : Na'ara college dal'gipaon napengahanaba. Nang'mako maina nangkua?

—
Balkam : (deldik dake) Mai college dal'gipa ! la Medik maikoba tol'e on'taiahakonne da'oba ?

Medikma : Na'ara Malajingchirara attamanti roenganaba ; nampagnok na'a bi'sa. Aganode knachakjava. Malajingan dakchakkan da'ode. Angko maina nangkua.

Balkam : Sawa agana ?

Medikma : Jeba ; maina nanga nang'nara.

Balkam : Anga u'ia sawa tol'gipa. Malje ong'enggen jedakeba. (Medikko nitate) Malje Medikna tol'enggen. Malje ong'ja ine jeboda, je. Aiao ! Bilongskaake ia me'chikni tol'na man'ade ! Da'mo man'gen bikoba.

Medikma : Seng'a dakboda. Na'a pangnan namakode dakjava ; ma'ni pani aganakode pangnan ra'chakjava, ka'onangnade ka'onangna. (Medikma dulio kilding rikgimin bobinrangko done loomchina ra'anga. Medik aro Balkam sakgni dongrika.)

Balkam : Ia me'chikba tol'nasa tol'na. Agreode doksranggen nang'ko.

Medik : Maiko anga tol'a; kakketkosa agana.

Balkam : Tol'jaode maisa ; basako anga attamanti Malajingchi re'anga ? Sawa nikana angni attamanti roako ?

Medik : Na'ade jeaigen u-de ; babana kenengajokona. Maljean agana, nikjaode aganjawa biaba tol'ede.

Balkam : Na'songde Malje ki'jeni jeko aganoba bebera'smakaigen : Maljeni sa'grerangjokona.

Medik : Bebera'gento, bebejokona.

Balkam : (ka'onanga amchakjae. Medikko sikrurue) Reang ! Maljeko rimebo. Ia me'chikko tik ka'gen anga da'alde.

Medik : (sko rim'e chrike) Ai, ai, ia Balkamde !
(Medikma nokningoni ong'katbaa aro bobin jakbitbaachi dokdingdinge manenga.)

Medikma : Balkam, agre seng'a daknangjawa na'a ; doknarara satnarara. Denggu daknade changakonba. Manengako man'ade sikjadoe mainasa katta ra'ja na'ara. On'tisanan ka'onangnade donaibo nang'ko. Nang.pa knaode nambegnok na'a.

(Indakmitingo Medikpa nabaa.)
Medik aro Balkam bakan nokningchina re'anga.)

Medikpa : Mai ong'chima iamanga ? Sawa mai daka ?

Medikma : Mai dakgen ; abisa gisie dokna am'chimenga.

Medikpa : Medik, Balkam, iachi re'ba. (Medik aro Balkam kending kending ka'sine sepangona re'baa.) Na'songara tom'tom dongna man'chongmotjama ? Jegrik-dokgrikosa kusi ong'aiama ? Sakgnian janggal man'gen, na'song. Ia Medikba Medik abitungna krae dakjawa. Balkamba Balkam ; on'tisaba bamnan sikjawa. Jong-ada no-abina ka'sana changjade mai ong'gen na'songde ching'ja'manchide. Da'o changsa gisitaiode tik ka'gen anga na'songko. Re'angtok.

(Medik aro Balkam re'anga.)

Medikma : Matchotbajokma da'alde ?

Medikpa : Baonisai. Kam ka'an gri ! Roan pakmajokona maidake man'gen ia-manga ? Billna re.angaba bao ; pass an ka'an ka'kujana. Basak chasongon toade tojok. Maiko dakon suk ong'pilgen u'ija angade. Uko dakoba dikdak ; uko dakoba dikdak. Paisa am'enga gisikode ; angara on'skaja pelsaba.

Medikma : Tontepaba mija Budbal salosa man'anganaba da'ning ! Uaba re-rokroka amchakjaesa. Bangalde bangal da'ning !

Medikpa : Bangalba A'chikba apsanai. A'chikska ine ka'dongani gri daode. Kamde gri. Chasongan bilongen dingtangsrang da'ororode. Toginarara, cha'boknarara am'tokaia gimikan. Kang, chi ra'esrangboda, angade gitok ran'engjoksa.

Medikma : (Jako chi glasso ra'bae) Ha.
(Medikpa chi ringa.)

Medikpa : Ha. Him, da'o ong'katangtainan aratjokai angade ; chel'aminga chel'pajaosa.

Medikma : Bachi ?

Medikpa : Aiao ! Co-operative meeting dongana noba da'o. Attamoba gilja ka'dilna nanga ; maikon dakbreng. Medik, gue denba. (Sepango ongka

donako ra'e on'e) Ha, mola soat.
(Me.dikma mola so'na napanga aro
Me'dik gue den'e napbara.)

Medik : Ha, gue.

Medikpa : Na'ara angni agangipako sejok ?
(Medikma sokbaa)

Medikma : (Mola on'e) Ha. Baoni segen ia
me.chikara. Kratchaa inadakeming
dongchipaengade. Maikai cholipa-
naka? Ja'manode man'riksrangjawa.
ba ia bisa.

Medikpa : Iamangde nangako daknade man'-
jawa. Ong'ai ong'jai daknade krat-
chajakonba. Bakbak sebo.
(Medik kratcha'e ni-kome chaka.)

Medik : Im.

Medikma : Balkamko knajok ? Malajingchirara
attamanti roenganaba.

Medikpa : Him. Balkam, Balkam, re'ba.
(Balkam kena gnanng re'baa aro
pagipani jaksokgijao chadenga.)
Iachi re'ba, re'ba. Re'babo sepang-
ona. (Jaksokahaon pagipa nachil
sala aro Balkam grapsi mikosi dake
chaka.)

Medikpa : Maina nachil sala u'ia ?

Balkam : Maia, mai daka, angara ?
(bama gnanng)

- Medikpa :** Maia daka ; ian Malajingchi attam-anti jim'ani boksisi. U'ijok ? Katta manijaode duk man'a ; u'iakonba. lana bateba duk man'kugen na'a knachakjaode. (Balkam Medikko ka.onange nie re'anga.) Da'o bachi katangenga ?
- Medikma :** Collegechiba watatsrangna nangja ia bi'sako. Denggu dake bon'aigen ; magna paisa galaigen. Ma'ko pa-ko kratcha'atnasa changaia.
- Medik :** Da'siba angkosa' tole on'a pote-ming dokna am'pila daka.
- Balkam :** Tol'jaode maisa. Na'a angko pang-nan pangnan tole on'ronga.
- Medik :** Maiko tol'a angara ? Na'a re'angja'?
- Medikpa :** Na'aba jrip. Kaja ka'nade don-aibo nang'koba. Mola so'ba. Re'ang-bo. Re'angako knataiode namkale chima man'gen, Balkam u'ibo. (Balkam nokningchi napanga)
- Medikma :** Maljepara mai daknasiengana da'o-ara ? Maikosa na'songara mijatamo betbetchimenga ?
- Medikpa :** Balkamni giminan. Uaba da'oara kusi ong'breja gita dakaengaha. Haida ia gadha bi'sani ong'ai ong'-jai dakakon knaahakon.
- Medikma :** Da'oara maisa ong'gnok ?

Medikpa : Haida ; maiko dakgen. (Medik mola so'e ra'baa.)

Medik : Ha.

Medikpa : Balkam, (Balkam ong.katbaa. Pa-gipa mola ringjoljole) Attamo mat-chu nisobo. Roamangnabe gisik rakbo.

Balkam : Im.
(Balkamna agre gimikan ong'kat-angtoka ; ja'mano ua chokkio asonge donga. Aditani ja'mano Tonte nabaa.)

Tonte : Oi mosa ! Mai, jomrumrusa da.al-de ? Mite amuama nang.ko ?

Balkam : Mite amuanan batjok u-de ; mite tatajokona.

Tonte : Maianasa mite tataljok nang'koa ? Love-sick dakengama ?

Balkam : (Gisiko ka'onanga gnang) Tol'e on'chimengajokona.

Tonte : Oo, sawa ?

Balkam : Sawagen : na'aba u'iaengaba.

Tonte : O. u'ijok. Maika.gen tol'gipade bang'a ; sakode tol'ja. Mai dakna katta jelataingna 'nesa chakasa kakketaia anga an'tangba. Katta mingantina gisik on'paode sko sa-

aigen ; jrip dongon nambata. An-tangde, ia gita jokbaa ; ia gita jokanga dakaia angade.

Balkam Angade man'ja. Tol'akode namnik-ja ; ka'oba nanga. Kakket ong'osa manengoba chaktoa. Basakobade katobingbangsrangna skaia angade. Chel'ao dongon maming katta knakaljava.

Tonte : Maina duk ong'a unara ? Na'ara da'on re'angaignokba.

Balkam Na'aba an'seng an'sengsa ; maidake re'angatengana. Na'a paisa on'gen? Iako chanchien badita sko saenga.

Tonte : Nang' mamara ?

Balkam Na'a dakeboda.

Tonte : Na'an chol namarangko gale roengajokona.

Balkam Dus ; angade jara ong'ja. Gamba bang'kal ; man'eba cha'kal.

Tonte : Maiko na'ara indina ; ukon chasong rikkit ja'rikbaenga. Na'ara maikaisa gonggege chanchiskaaha mosa, name chanchikubo.

Balkam Maiko chanchitaitaikugen uko mingiminkoara. Tik ong'nikjahade ong'nikjaha ; man'ja angade. Gipinrang jeba dak.

Tonte : Na'a saksanmangmang indake chan
chiara mai ong'pagnokna.
Cholijawake.

Balkam Uade uan ; moskilde ong'a. Indiba
nambatatna skatangko chu'sokat-
na jotton ka'ao kusini dongaba.
A'gilsakan niam mingsasanchide
cholijake. Skangni chasong aro
da'oni chasong baditan dingtanga-
ha. An'chingsa jara dake uan uan
dongainga.

Tonte : Hambino na'an niam gital bikot-
genkonai mo ? Man'jawa na'a. Uan
uan, ukon ja'rikpilna nangaigen.
Jik kimode, haida nang'kon bat-
kalesa ga'chepe donsrangarok.

Balkam : (ka'o nangbae) Ha ! na'a maina
indina ? Basako iarangko saksan
dakna man'ako nikjok ? Indiba
namgijako namatna chanchina
nangjawama ? Maming tikkela gri
indaken an'tangtangan namroioia
ine na'a chanchiama ? Namgijako
gale namako ra'rikesa silrororaba.

Tonte : Na'ara dakbewaltangkon chonnik-
engajokona. Bebegitaba maio
namja. Atcha, badia jatni dakbe-
walo namgija dongja angna
aganskaboching ?

Balkam Dongade dongaign ude ; chu' sok-
srangnade man'jawa.

Tonte : Indide ?

Balkam : Uni gimin indaken dongskaaibo ?

Tonte : Daknade nanggen indiba man'jawa. Jatni bewalko sawa dingtangatna ama ? Magna jotton ka'aigen. (Medikma nabaa aro dulioniko kilding wengimin bobinko am'e ra'anga.)

Medikma : Maiko betbetchimenga iamang mosara ?

Tonte : Bao, chingatangtangsajegrike roa- inga na'a mani.

Medikma : Uanaignok nasong mosasade, sakon jekugen.

Tonte : Maidaka !

Medikma : Na'aban peon dakpaenganaba mo, Malajingna ?

Tonte : Dus ; bingbing bangbang. Sawa tole on'a nang'na ? Malajing ingipaming ku'saba anga agangrikan dongja.

Medikma : Uanjok ; na'aban jeaignok. Apsan nomborjokona. Nang'ma namkaljok ?

Tonte : Im. Mijalde chakate ropilengaha. Hai, mosa, re'gnok ?

Medikma : Da'oara bachina re'tokna am'engaha? Unikode bachin sokangtokgen na'song. (Medikma ong'katanga.)

- Tonte :** Pante-me'trangni B.Y.F. meeting dongaba. Uchina re'na inesa mosa-ko rimpakangna nappakjolachimba angara. Uara gipinko betbete jamangainga. Oe, mosa, da'o dongaba, na'a gualjok ?
- Balkam :** Ihing ; angade re'na man'jawa. Baba ka'chagensai. Matchu nisonaminga nanga.
- Tonte :** Da'on bakkakan matchotaigenba. Hai na'a ; srapaigenba.
- Balkam :** Da'mo anga aio sing'kuna. Ai, anga meetingchi re'angkunane ?
- Medikma :** (nokningon) Da'oba roamnasa. Malajingchi re'angna budi.
- Balkam :** Na'simangara una agrede kattakon man'jahama ? Uko chekchek.
- Tonte :** Meeting dongbebeasai mani. Bia dongjaode moskil ong'gnok. Bakkakan matchotaigenba. Matchu nisonade srapeaigen.
- Medikma :** Indakode bakkak re'bapilbo. Kam bang'bea roambana nangja.
- Balkam :** Im.
- Tonte :** Hai, taribojok.
- Balkam :** Ra, dongsobone mosa.

Tonte : De dongsogenba, bakbak tariebo de.
(Balkam napanga.)

Balkam : (Kni chite, chola dingtangko gane
nakatbae) Hai, rebo.

Tonte : Hai. (Balkam aro Tonte sakgni dam.
san ong.katanga.)

(Screen chipa - nakatchengani bon'a.)

Dakmesokani Bak II (Gnigipa nakatani)

(Biap apsan. Malje aro Medik sara a'palo asonge golpo ka'a. Uamang dakmanda dok-giminko niroroe agangrika.)

Malje : (Dakmanda gitalko badale niroroe) Nambeahake ian. Dal'duaakode angade pul kolakoba namnikpils-kaja. Me.plipba nambejok. Indiba rongkosa dingtang ong'ode nambatgnokchim. Indakgipara moila nangako rang'san u'iaiasai. A'mang rongan namsusu nika angade. Ja'rikingba dal'kuode nambatgenchim, mo sari ?

Medik : Im. Angan aganpaa na'a ; aiara manija. Da'ororode ja'riking dal'-akosa namnika ine angan aganachim. Anga an'tangba ja'riking dal'akosa namnika. Ukosa daran-gan ganaba gantokaia da'ode. Doknaba uan altubata. Pul koloara, aiao, ru'utan. Mikot mikot mikron neng'aming ; damba dam niskaaibo.

Malje : Iaba nambeaha na'a, sari. Anga ra'angsrangnajokne, sari ?

Medik : Anga aio sing'kunane. Haida bia Walingmana donna am'engarok. Mija Mongolbar salo biaba nap-pakange donpabosan donpabo

kangangawai. Ong'jaoba da'o dokenggipako ra'angskaboda ba uko namnikjaode gital daktainasigipa donga. Haida ambin antion sringtainaba donga. Nang'ni namnika gita tiktak agane donangbo ; rongkoba, pulkoba. Unon nambatgenke, mo, sari ?

Malje : Ra, indakode uaba namaigen, sari.

Medikma : (Loom nokoni aganata) Medik, saming betbete rochaenga na'a ? Nang'na kam dongja ? Tangode walchipa dakaigen.

Medik : Sari Malje re'baako !

Medikma : Malje ! De mainasa cha dake on'paja. Indinsa rodilaiakon. Nang'pa re'bajok, mani ?

Malje : Baosa mani. Da'sin sokbanade nangahachim. Haida angni ja'manchi sokbaengaharok.

Medik : Rosobone sarine, anga on'tisa babilsichi re'angkuna.

Malje : De sari, katangjawaba. (Medik babilsichi re'anga aro Malje saksan photo dongipa ki'tapko nisoa.)

Majle : Sari Medik, anga nang'ni photoko niengane.

Medik : Mai photoko ; donganba dongjaba.

- Malje : Aiao ! Pante namnameba bang-beake !
- Medik : Im. Bang-beaba ; nangode oke ra'-angtokboda.
(Aditani ja'mano Medik cha dake ra'baa.)
- Medik : Ha, sari ; chi ino chibebe. Mamingan gri chingode. Changsa roba-paoba magnasajok na'ade.
- Malje : Hao, maisa ong'gnok ! Maina dak-bajok na'a ?
- Medik : Chirarasaba ; mamingan gri.
- Malje : Maikosa nangaljoksa ! Chingchide nama nama cha'e re'barongaba na'ara.
- Medik : Oea, na'songchide maming gri re'-barongaia nanggo. Ringatbo na'a sari. Tangode ka'singnok. Chi'asa chi'nikama chinikjama na'ade.
- Malje : (Ringote nie) Aiao, nambejok ; chi-jokba. (Malje ringote chako chokkio donata aro ja'pingo photoni ki'tapko oprake nitaia.) Iara bano ka'gipa ? Na'songni class picnic ?
- Medik : Oe, da'skari changsao ka.gipasaba. Tura a'brio. Nasongba re'angaba unsaloara ?
- Malje : Oe, re'anga ; indiba chingade Ganol chisamchisa. Eden Bariosa cha'eskaa.

Chel'ara re bapilode neng'an maiba dakbapilaijok. Oo, sari, iasai, sani photo iara? Pante silbeake, mik-terokroksa. Angna on'skabodamo, sari; anga tape donna. Na'ara da'on da'on mantaiagenba, mo sari?

Medik : Aiao ! Sari, angaba iasan, dongja. Iakon jentensa anga man'jok. Biade on'pajasai. Bi'skanaba kratcha'a angaba. Na'an bi'e ra'na pa'kal-gennesa. Nang'na on'atode angode dongsrangjawaha.

Malje : Ra'angjawa na'a sari ; Iara nang'ni malsa ; kal'akesa roaba.

Medik : Dongbebeja sari : on'aigenchim. Kema ka'pabone, sarine.

Malje : Iakode Rekan A'ding gita nikaia angade. Ong'akonaba mo, sari? B.Y.F. rangni mija tom'ao ka'gipa gita nikaia angade.

Medik : Oe, Ia me'chikkode nidiksrange angade. Mija antide seng'a dake me'asa jinma baksasa antichi re'angengaba. Ramao re'pakgrika. Angko nikoa deldik dake jrip dakaijok bia. Skangde seng'a dakengachim.

Malje : Angko tol'e on'taianaba ia me'chik-ara. Ong'ai ong'jai songgimik jangat-ani gimin namen ka'onanga angade. Bia an'tangde badita namachim.

Golmal ka'ani gimin nidikbea angade da'ode ; niatnan siksrangeja.

Medik : Oo ; bia an'tangde nambeajokona. Biasan batsrangake uko aganode ; Samingde roja bia ; sanade seja bia ; pilakon golmal ka'namangmang changaia. Angkoba tol'e on'aba biara.

Malje : Oe, na'a sari. Iarangko chanchiode kratcha'bea an'tangan. angade. Na'simangba maikon chanchipilengen. Indakesa re'banaba kratcha'bea ; rona skoba. Basakobade napsiksika insrangaig nok !

Medik : Injamangja na'a sari ! Sawasa ingnoks ?

Malje : Aia ! Na'asa indina ; innakgipade bang'sranga, diljava. Bebe ; iarangko chanchiesa angara na'songchi robanaba kratcha'beawai. Re'nahane sarine ? Cha.jok ringjok.

Medik : Rokuboda, sari ; da'on katgalgalgnokma ?

Malje : Ru'utbeahake na'a sari. Tangode aimangba ka'chasopilgnok.

Medik : Na'a aganbajane ?

Malje : Agana aganade ; bi'en re'baake angara na'songchinan.

Medik : Ka'chajamangja indide. Nang'mara kratcha'a dakbea inesa inengake mijade.

Malje : Ru'utdugaade namskaja da'ning ;
jeoba namsang roosa nama.

Medik : Ru'utjamangja na'a sari. Kenama ?

Malje : Aiao ; maina kenalgnok kenade.
Mandeska jim'jojoa ingenko ! inda-
kesa darangchiba ong'katjaba
angara. Nokon srok dongaia. Aiao !
Golpode golpo bon'jawa ; re'na-
hane sarine ? Basakoba robataina-
dong.

Medik : Ra sari ; na'ara re'nara sikbeengjok.
Changsa robapaoba maming maming
grisajok na'ade.

Malje : Hao ; maikosa nangaljok ! Ra,
re'bebenaha ?

Medik : De. (Medik are Malje re'na chakata
aro Balkam napbaø deldik dake nia)

Balkam : Ah ! Malje re'baa ! Maiko betbetchi-
menga ?

Malje : Bao gri. Re'nahane sari ?

Balkam ; Roboda, mainasa katgalgalna am'a.

Malje : Da'sinisajokai ; ru'utpilengjok, re'naha.

Balkam : On'tisa rokuboda. Na'a re'bajok
nambejok. Anga nang ko grongna
nangbeengachim.

Malje : Angko grongna !

- Balkam Oe, nang'ming baksa katta agan-
grikna bang'en gnan.
- Medik : Hai, babilsichi sari ?
- Balkam Bano babils wal'kutipachisa ro-
dilna am'a ia me'chikara. Ianon
nama; ianon rokan.
- Malje : Uchibaan namaigen ; mai ong.pa-
gnoksa ? Hai.
- Balkam Na'ara angko Medikna tole on.ta-
iamo ?
- Malje : Bao ; basako, maiko !
- Balkam Malajingchi attamanti roenga ine.
- Medik : Oe, da'ning ; na'a mijao aganaba.
Mai ong'pagnokna unara.
- Malje : Ka'enga inede aganawe ; indiba at-
tamanti roenga inede agana dong
jachim angade.
- Medik : Angaba attamanti roenga inede
aganjamangja ; aisa ukode tol'dapaha.
Ka'onangan ku'sikjokona badean-
gaha uade.
- Balkam : (Maljeko nitate) Indiba na'ara maina
aganpa'na nanga. Anga Malajing-
chiba rogen ; jechiba rogen. Na'a
maina a'dingpaa. (Malje mikchi
ong'baa.)
- Medik : Balkam, jrip.

Balkam : Mijaoba changsa tol'e on'a na'a. Na'song pangnan ma'ningsa ma'ningsa tol'e on'rongengade.

Medik : Donboha na'a, Balkam ; seng'a daknabe.

Balkam : (Ka'onangani ku'rang gnang) Na'a da a'dingpaa. Na'aba tol'gipa saksa. Angade chakchikbeengahane ; da'on srang srang aganatengjok.

Medik : Ia Balkamde uan ; pangnan indaken seng'a dakgen. Nang' Malajingchin re'ang' uchin dongbo ; maina iano donge seng'a dakchaenga.

Balkam : (rakdate) Na'a srok dong. Na'song gimikan tol'gipani jat. Tol'e mit daknade donaibo na'songko.

Medikma : (Nokningoni) Mai ong'a Medik ? Sawa maiko a'dingenga ?

Medik : Balkam ude. Seng'a dakenga.

Balkam : (ka'onange) Seng'a dakgento.
(Medikma nabaa.)

Medikma : Maljea maina grapenga ?

Medik : Balkam seng'a dake inengajokona.

Medikma : Ia bi'sade uan. Seng'a daknade donaibo nang'ko.

Balkam : (krengpila) Mai seng'a daka. Na'song pangnan pangnan sakgipinni tol'ako bebera'e angkosa ina.

Medikma : Na'a pangnan aganako knachakjawa ; katangbo Balkam. Iano dongnabe. Nang.ni a'sel chinga nachil sachajawa. Malajingchin cha'ebo. Nang.ni kusi ong'ako nigen anga.

Balkam : Donggento ; dongchajawa angaba. Na'song namgiparara dongchimbo. (Ka'onange grapjole) Na'song mikoba cha'e bonatjawa. Katgen, katgen, dongjawaha angaba, da'on katgen. Na'song kusi ong'e dongchimkande. Angni donganan na'song duk man'-beengajokona. Anga katbrange jeoba sigen.

(Balkam mikchi ipake ta'rake nokningchi napanga.)

(Screen chipa - Gnigipa nakatani bon'a.)

Dakmesokani Bak III
(Gittamgipa nakataani)

(Jambal aro Medik babilsio mi cha'na asonga)
(Jambal ku'sa du'ate)

Jambal : Pit ; kariba gri, kalchiba gri. Maidake bijak songa ?

Medik : Nang'ni man'e on'ako songengajokona.

Jambal : Oo (Jambal mi cha'ako dontonge, jaksue a'palchi ong'katanga. Nokningo bi'sa grapata. Medik babilsio mi taririka.) Maisa bi'sa grapakoba sandija. Simsakgija dak-aia ia me'chikara.

Medik : De na'an indin dongainga ; niatpa-boda. Kam ka'engako na'an nik-aingaba. Kale angkosa dosi on'na am'aia.

Jambal : Nija angade ; anga bi'sa bariktimgipaba ong'ja.

Medik : Na'ade pagipa ong'jajokona.

Jambal : Ongjawe. Ja jani bi'sakode ang' de inpajawa angade.

Medik : Na'a indake amitna skode maina dongsranga. Sani draana dongeming indaka kattarangko nakatbaatenga.

Jambal : Dongjawa angade kataigen. Indak-gipa denggu me'chikming anga janggi tangna man'jawa.

Medik : Na a angni denggu dakako nikbe-beama ? Anga saming rojok ? Na'a kakket aganbebena man'gen ? An-tangni denggu dakakon agancheng na.a.

Jambal : Anga man'jawama ? Na'song chitti segrikako anga uijama ? Na.song ka'sagrikako anga nikjama ? Na'a maiko jenaka ?

Medik : Uko aganaode na'aba apsanaigen. An'tang dosi gripa'gipasa aganpa'bo. Apsanpa'aigipade maina a'dingpaa. Bebegitaba uaranga gimikan nang'ko kimna skangsa. Na'a an'tangde nambeajokona. Aganode na'a bat-sranggen. Anga jrip chake dongani giminsa. An'tangkode u'ipaja ine chanchienggen.

Jambal : Anga saming maiko daka ? Agan . . agan . . man'jaosa nang'ko anga.

Medik : Bebema ? Man'jasusu nikama ?

Jambal : Agan, da'on, agan.

Medik : Na'a mija Sonibal attamo waltongsa kakket bachi roa uko agancheng. Saming roa ukoba aganboma ? Bano roa ukoba nangenma ? Angkone u.ija ine na'a chanchia ?

- Jambal : O bebejok u'igipade. Anga Jangsengmangni nokosa tas kal'ake. Na'a maiko seng'a dakpaenga.
- Medik : Oe, Jangsengmangni noko tas kal'a sakgni Silcheming, palango. Ong'ja ine jeboda. Jrip donganasa na'a pangnan pakcharonga.
- Jambal : Na'a nikbebeama? Gamna skengama Sakki man'jaode.
- Medik : Dake niboda, ninakai. Na a angni jrip chakani giminsa galcharonga. Batesa angkosa amita. An'tangni so.-mal donakode menggo ki'i pindapa.
- Jambal : Mai so.mal dona. Na'a dai gamna skengama? Nang'ni kamko nich-engboda.
- Medik : Angni kam namjaode na'a maina agane ra'ja ; maina skija. Na'a maina segipa ong'sranga ; mainasa me'asa ong'sranga angko sason ka'na man'jaode. Jeba ong'bo ; angade nang' gitade sakgipin me'asa baksa rokuja. Ka'saaba ong'ja na'a ; ama appani mal-mattana mikboke donggipasa.
- Jambal : O, na'a angko nang'ma nang'pani gamna mikboksimake dongenga inesa chanchiamo. Indide anga da'alonin ia noko dongjawa. Nang'ma nang'

pani gamko anga on'tisaba jaksi-
kurtechiba dangdikjava. Na'song
ma'ningsa dongchimbo.

Medik : Ka'sajawe ; ka'saode mainasa sak-
gipin me'chikming roa. Gamna
ong'jaode maina dongenga.

Jambal : Nang'ni kamko niboda : Sawa nang'-
na ka'sana man'gen. Anga 'chak-
chikbejok aro manjawaha. Nangma
nangpani mal-mattana mikboke
dongenggipaba ong'ja anga. Da'on
re'gen. Na'song suk ong'e dongrik-
chimbo.

(Jambal nokningchi napanga.)

Medik : Katang, 're'ang' Na'a griode choli-
jawaha ine chanchiama ? Iano
dongoba na'a bil'si bil'dak kami
ka'enga inachiba ong'ja. Pokordas
dake ronasa choliaia. Nang'ni
dong'jana gimagnokba ong'ja.

Jambal : (Ba'ra chone katottenge ong'katbae)
Ra, dongchimbo. Angade re'gnok.
Nang' gita me'chikming dongana
bate dongjasrangan nambatgen.

Medik : Katangbowe ; maina dongchaenga.
(Jambal adita re'anga) Da'o maiko
ra'angenga. Mamingkoba ra'angna
man'java pilakan angnisa.

Jambal : (Ba'ra katomako gale) Ra, indakode,
name nirikbo. Ja'mano cha'ue ra'-
anga potna man'java.

(Jambal an'pile re'angna ja'ku dea. Medikma kok ole sokbaa aro sambao chadengdike Medik aro Jambal-chiko nia. Jambal on'tisa chadengdikani ja'mano gongrake re'anga.)

Medikma : Mai ong'a, Medik ? Gisitaiakon iamang ?

Medik : Mai ong'gen, na'aba u'iaingaba. Angko amitsimsimani gimin da'alde anga ra'chakjok. Pangnan seng'a dakronga ia me'asa. Kamchide ma. mingba ong'jawa.

Medikma : Ma'songde uan' Gisisimsimaingbo, jegrikraraingbo. Indakon nambea-jokona. Katgrike, melae dongosa suk ong'bea. Chakchikgrike name janggi tangnade maming saloba man'jawa.

Medik : Mai, ai, anga chakchikjama ? Na'a an'tangan nikaingaba. Anga badita chakchikchagen. Chake on'ode bate batesa ia mandede pakcharoroa. Gimiknan sima-ari dongaba. Angaba man'a gita-chakjok ; mai chakja.

Medikma : Na'a chakchikbebeen da'oara kat-angahaba. Maina rimrikja na'ara chakchikgipara ; maina jrip jrip niri-rikaia. Na'song mamingon meligijagi-parara ; melinaba jotton ka'jawa. Janggi tangatangnaba simsakgija dake ja'manode maikai cholinaka na'a.

Medik : Mai chakchikja ; sawa ang' gitaba chakchika. Na'ade haida ang' gitaba man'srangjawa. Bebegitaba anga namnikaba ong'ja, draani giminsa. Indakgipa me'asaming sawa maidake janggi tangrimna man'gen. Salsamangde nampaosa. Na'aba man'jawa angko gita kal'akode.

Medikma : Man'aja dakaja. Nang'ni namnika mandeko maina am'e kimja indakora. Chingni name nikako chingade sing'e on'gen. Na'a namnikjachongmotode maina skangni aganja. Da'o bademan'o, bi'sa desa man'pilahaosa maina indakarangko nakatbaatna nanga.

Medik : Na'songanba angni namnikgijako skangnin u.iaingaba. Anga maina agangeh. Aganoba na'song mingpa-gen ?

Medikma : Chingara pilakni gimin nisamsoesa dakachimba. Namnikjachongmotode sawa dragenchim. Inditana kingkingde nang'pa nang.maba jara jari ong'jachim. Na'an asolde namja-engajokona ; chakchikan komisranga-jokona, namen mesokjaengajokona : maikai sawa segipaba namgen indakoara.

Medik : Ai, na'a pangnan angkosa dosi on.a. Anga nang'na aganengjok, chakchik-

bejok ; chakchikbejoknisai. Maidake
chakchikako nang'kna nang'nara ?

Medikma : Chakchikaja mamingja Na'a an-
tangni gimin mangmang chanchiari
dakaiode mai ong'gen ? Mai nama
bimingko songgimikna paljojoenga
ukode. on'tisaba chanchie nijawa.
Medikde segipako nokoniko a'rikat-
jokna inara knatobeaba. Anga duk
ong'a Medik. Nang' kamni gimin
chinga badita sko sachagen ; badita
kratcha'na nangkugen.

Medik : Angaba an'tangni balkosa u.iaia.
Darangan sakgipinni balni gimin
u'ija. Anga mai dake kal'akakode
chakkuja. Saoba inode basakonin
katgrikman'gnokchim. Anga ong'-
esa inditaba baia. Basako anga
ku'keng wakeng ingitopilachim.
Na'aba chanchiesa aganboda.
An'tangkosa kakket ong'nikaia.

Medikma : Indide skatangtang dakaibo. Na.a
me'chik dal'jok ; bi'sa desa dongpil-
jok, chanchina gisik sokjok. Indiba
chingko am'skanabea. Na'an
gimikkon daktokaibo.

(Medikma kok ole nokchina re'anga.)
(Baljing telegram ra'bae Medikna
on'ea.)

Medik : Mai, Bura, chitti ? Sani ?

Baljing : Ia telegramna. (Medik telegramko kena g'ngang jak til'tile kulia aro poraie nia. Unon bakan ma'gipako okanjoljole nokchina katanga.) Mai ong'a abi? Mai ong'a? (Nawang dake nirika aro ja'mano jarikanga.)

Medik : Ai, ai, Balkamde, ai (grapjoljole agana.)

Medikma (jajrengbee) Mai ong.a Medik?

Medik : Balkamsai, ai, Balkam, sijokna.

Medikma (Rang'san gambee grape) Balkam, Balkam, ang'de. Nang'koa indak-chinasa ba'ajokma angara, Balkam. (Medikma aro Medik gam'e grapa aro Medikni bi'saba uamangni grapa-na kene chrike grapskaa. Noksulo donggiparangoni Maljingpa, Nokengma aro Tonte chabaa.)

Maljingpa Maia ong'chima, Medikma? Mai daka Medik?

Medikma : (Grapjoljole) Ia bi.sade bon.srang-jokna; ia telegram sokbaa (jako ra'bitgipa telegramko mesoka). Indaknasa ia bi'sara gipinchi katnarara am'kamaia. Angan mijanin kenchaksimsimainga ia bi'sade mai ong'gen ine.

Maljingpa Jambala bachiaha; obostako knajok?

Medik : Katangjok.

Maljingpa : He da'ode ! Ra, ra, jong Tonte Jambalko rimebora ; sakoba rimangbo. Abitangmangchi ong'enggen ude. Maljepakoba aganatjolbone.

Nokengma: (Medikmani sambao asonge ka'sik-sike grapa) Iamangde mosasaan indakao ga'aknasa atchiaijok. Angan indakgen ine mosatangkoba watat-jachim. Kattakon manija ; dra dra re'anga. Da'oara ma'ko pako nikgija ban songo, ban langgao sie bone katangaha. (Grapjoljole) Balkam, dede, mai dakgaljok na.a.

Medikma : (Grapjoljole) Balkam, maina angko wate katanga. Nang'ma buchumako maina gale kata. Nang'ko indakgen inen skangnin beng'achimba, angara. Chingkosa na'ara ka'saja ine chanchiaia . . . chingara nang.na ka.saja ong jachimba. Da'oara banon bonsrangjok. Mikangmangmangkode nikrikpaosaming. Balkam, maina indake dakgaljok na'a. (Indakmitingo gipinrangba nabaa aro Maljepaba sokbaa.)

Maljepa : Ha, jong lentren soatpabo na'a ; andalangpilengjokde. Kang, Jong, chingchiko geslemp ra'epabone. Kerosine dongama dongjama ; dongjao de rujole ra'babone. O, mingsa, chini se'el bunga aro cha poasamang Dokrekpamang dokanoniko ra.-

bajolbone ; angko aganaibo. Hai,
Maljingpa on'tisa jamdap pinsrangna
ia ; mikkaminga tik dongja.

Maljingpa : Hai, angade da'sinin uko chanchi-
beenga ; maikai walsengtokgen ine
jajrengengachim.

Maljepa : Ra, jong, Baljing, awano wa'a dane
dongipako chilbapaku na'a ; an'ching
jamdap pinsrangnajok. Ianonin joljol
ritchuataine. (Reroroe biapko me-
soke) Ra, iano, iano, iano, a kol
cho.pabone Maljingpane. (Jambal
aro Tonte sokbapila aro Mediko
sing'a).

Jambal : Bao telegramara, nina ?
(Medik nokningchi napange tele-
ramko ra'bae on.a aro Jambal
poraie nia, aro on'pila. Uamang
jamdap rikpaa.)

Tonte : Mija chiti seatgipaon chingkode
gulian mikka wadapa gita dakpil-
ainga ine angna janapata. On'tisa
rong'kol dakarangosa chakaingana
bisongde.

Jambal : Dakgrikengajokona indakaigen udo.

Maljingpa : Biara jamadar ong'ahanaba mo ?

Tonte : Jamadarja da.nang ; mijaon promo-
tion man'ahanaba. Haida da'ode
subidarmangde ong'enggnokchim.
Bisong dolan dakgriknade changbat-

ana. Indiba Chineseranga bilong-skaanade; chibrim mala mala dakaianajokna sawa mai dake am-chakgen bisongkoa.

Maljingpa : Mande bangtingtingesa bisongde choliainggen, Sinaba kenpajama uamanga? Nepaokonba mo bisongara?

Tonte : Ongja, Ladakhosai; Kashmirchisa. Nepade an'ching Assam kosakmangmangon.

Jambal : Angade bisongkoa Pakistanko dakgrikenga inesa chanchiachim.

Tonte : Ongjai; Ladakhosana; Kashmirosa. Biaprangba bisongni donggipade ga'nangsrangjana. Himalaya a'bri sepangpilahajokona. Suurirarasana aro namen sinbeana. Bolrangba chaan chajanajokona. Ja'a jakranggan jada changaianade. Na'chilrangba aditani ja'manode nangtingatode be'angaiana. Walo walosa chineseranga re-barongaiana. Uandakesa uamanga Nepaonaba nappretbaanaba. (Redin Pamong, jolongga kebite nabaa)

Jambal : Iachi re'babo, Pamong; iano asongboda.

Redin : Iaban namaigen.

Maljingpa : Ra, jong, Tonte, bi.s.a gita mola so'epaku na'a.

- Redin :** Mai mancha dake siana ?
- Jambal** Haida na'a, siaha inesa ka'ataia ;
chingaba rongtalja.
(Maljepa nabae Redin Pamongko
nikata.)
- Maljepa** Ai, Pamongde banosa ; maina chok-
kio asongja ?
- Redin :** Ian namaiaba. Maljepa, na'songara
maiba bi'chakaniko dakna nangnik
genma ?
- Maljepa** Namaigenba, namaigen. Dakode
da'on dakosa namgnok. Tangode
waltingrorognok. Jong, Jambal ra,
manderangko tom'china aganbora,
kang.
- Jambal :** Ra. Oi, bi'sarang, na'simang jrip
dongpabone. Prayer meeting ka'-
nakana. Hai re'batokbohai, iachi.
Prayer meeting daknakana. Re-
batok. (Jambal table ge'sa aro chokki
ge'sako tarie dona aro manderang
gimikan tom'batoka.)
- Redin :** (Chokkio asonge, jolongaoniko
Sastroko bikote oprake (nanga bak-
rangko nisoa) A'bachengon nam-
gnokma ?
- Maljepa** De, namaignok.
- Redin :** (Chakate aganna a'bachenga) An'-
ching a'bachengna. Isol an'chingna
ka'sagipa, pattigipa aro nangan salo

dakchakgipa ; dukni, sukni salo, ja-jrengani somoeo, an'chingni kate chakram rong'brak. An'ching pilakan uienga; ia nokna dal'bea a'sel. chakna ampilgijagipa jrimbegipa bal da'alo sokbaaha. Indaka somoeo an'chinga pilakan Kristoo damsan nangrimatako man'giparang ong'e sakgipinni duko bakrimpagiparang ong'a. Indioba indakgipa, ta-rakbegipa balminduri gita an'chingni chanchisogija aro niksogijagipa obostarangchi man'pakangon an'ching Nokgipao pangchake ka'dongana agre aro Uoniko ka'dimeaniko bi'ana agre chol gri. Indakgipa obostao, je nokna, ia salo sokbaaha an'ching bi'chaknina agre maming dakchakniko on'na man'ja. Uni gimin an'chinga gisiksan, ia nokni depantena, jean a'songtangko chel'chakanina kamko ka'e ia a'gilsakko watna nangaha, uni janggini tom'tomanina, aro dongrikenggipa uni ma'drangna maikai bakbakan ka'dimepilani salrang nabagen indake bi'na ; maina an'chinga Sastroo Jisuni aganako gisik ra'a, 'Bi'ana agre, na'simang mamingkoba dakna amja.'

(Pamongni aganmitingo ka'sik-sikani, grapani ku'rangko knaa. Tom'bagipa manderang mikchi ong'paa aro ging ite ba'rarango,

bench ba chokkirango iapak-
chaka. Pamong an'tangba ja'-
manchi kaa chakna amje ku'rang
moa gnangsa agana.)

An'ching bi'aniko dakna skang an'-
chingni jonggipani gimin saoba
maikoba aganna skode da.osmoeko
man.gen.

Tonte : (Chakate aro grapna skako chak
chikprete) Ka'sara ma'a parang,
jong-ada no-abirang aro angni rip-
engrang; an chingko wate katanggipa
ripengni gimin angni je on.tisa
u'ipaako anga agana ska. Mosa
Balkam sagini, haida, angan nang-
rimbatgipa ripeng ong'a ine anga
bebera'a. Bi'saonin chinga kal'rim-ro-
rime dal'rima aro soksan cha'gipa-
rang gita ong'pila. Da'alo uni ia
a'gilsakko wate re'angani koborko
rang'gitik knae angni ka'tong chakna
man'jaenga. Agangimin gita chinga
apsan dal'rima aro apsan schoolo
poraia. Indiba bia angna class ga-
dangsa bata aro angni man'gijarang-
ko manengjoljole skie on'ronga. Ua
Matric pass ka'ahaon Collegeo po-
raina jotton ka'beaha. Indiba chol
ong'jatelani gimin sipaini dolo porti
ka'e kam ka'na a'bachenga. Haida
ian Nokgipani ska ong'naba gnang.
Uni chanchianirangko da'o anga

chanchiatpile nie an'chingni chanchibewalanirangna skang chanchiso-anirang ine aganna man.a. Ua an'chingna aro a'songtagna an'tangni janggiko on'kange chel'chakaha. Beben, ua da'o an'ching baksa dongjaha. Indiba anga beber'aa uni gisik aro janggi an'ching baksa da'o iano dongpaenga.

(Me'chik grapani ku'rang gam'bat-roora Balkam, Balkam, maina chingko wate ka'tangjok na'a, Balkam.)

Indioba an'ching uni mikkang bimangko niktaina ka'adongani dongjaha. Be'en-bimangni gita ua an'chingoni ekangaha. (Grapjole) Mosa, Balkam, na'ade saksansa

(Balkam sipaini ganding chindingko gane nokningona nabaa aro ka'onange niwilwila. Tonte nawang change nitate donga aro uandaken gipinrangba jara changa.)

Balkam

Mosa Balkam, Mosa Balkam, mai dakana angni bimingkoara mingenga, na'song?

(Jinmarang jara dakaoni nampila aro ka'dingtoka.)

Tonte :

Aiao ! Mosa ! Da'siomangmang nang'ko siaha ine telegram man'soa ;

chingade baditan habijabi, duk
man'tokengjok.

Medikma : (Balkamko gipake mikkang rim'roke)
Balkam, Balkam.

Balkam : Mai, ai ? Namaingaba angara ;
sikuja.

Medikma : Sawa gata bipasa indake to'le ka'-
ataha. Namkal-krakalesa dakpabo.

Balkam : Angni ripengsa ong'enggen ude-
April pul dakasaenggenba uara.

(Jinma ka'dinga)

Screen chipa-Gittamgipa nakatani
bon'a.

THE END

Published by
Tura Book Room
Tura West Garo Hills
Meohalaya